

1177 Inde ad maximam Divi Marci aram itum, ubi preciosissimam illam tabulam gemmis ornatam antea dicatam diximus, & quæ hodie inter publicos visitur thesauros. Hic quoque edito loco duo Christiani nominis Principes se invicem alloquentes suavissimum populo spectaculum præbuere. Addunt quidam, Pontificem quasi ita illum expiaturum, collo ipsius prostrati pedem imposuisse, cœpisseque interim Davidicum illud canere: *Super aspidem & basiliscum ambulabis*: notum est carmen. Tum Fædericum ingentes adhuc spiritus alentem, dixisse: *Non tibi, sed Petro*. Cui ille irato similis, impressa fortius planta; *Et mihi & Petro*, responderit. Ferunt Dominicæ ascensionis die id factum: alii victoriam per eos dies partam affirmant, ac in tam fœlicis rei memoriam Pontificem sanxisse, ut quotannis stato die in ea ade plena omnibus, qui confessionem fecissent, pateret venia. Nec ita multis interjectis diebus Fædericus Alexanderque, ut alii tradunt, Venetiis abiere: Veneti vero scriptores, aliquot post menses utrunque digressum memorant. Obbo Fædericum terrestri itinere, Alexandrum Pontificem cum Ciano Principe navi, eodem tempore Anconem pervenisse scribit: ubi, quum tota civitas ad portum officii gratia effusa, publico nomine umbellas duas, unam Alexandro, alteram Fæderico obtulisset; tum Pontificem jussisse ferunt, tertiam Veneto Duci afferri: ac coram permisisse, ut ipse & reliqui Duces ea perpetuo uterentur: quam nostra quoque tempestate solenni pompa cum reliquis ejus magistratus insignibus præferri videmus. Ubi vero Romam ventum est, ingenti quidem lætitia Pontifex a suis exceptus, quum inter multa & varia officia argenteas quoque tubas esset intuitus, quarum cantu & clangore omnia circumstrepebant, ad eos conversus qui illi apparebant, ex ipsis tubis Veneto Duci in adeptæ victoriæ memoriam octo offerri jussit: quibus & ipsis perpetuo summus Venetorum magistratus uteretur. Scio ego non deesse, qui arbitrentur fuisse insignia illa aliunde quæsitâ: sed Veneti annales id quod diximus habent.

ac, ut quidam scribunt, pedibus ab eo calcatur.

Cianus Alexandrum Romam secutus, magnisque ab eo muneribus donatus.